



Inatsisartunut ilaasortaq
Mala Høy Kuko, Siumut

**Kangianut nioqqutissanik pilersuineq pillugu § 37 naapertorlugu
apeqquteqaat nr. 246-2024-mut akissut**

Asasara Mala Høy Kuko,

Inatsisartut suleriaasianni § 37, imm. 1 naapertorlugu Kangianut nioqqutissanik pilersuineq pillugu Naalakkersuisunut apeqquteqaateqarputit. Apeqquteqaatitit uannit akisassanngorlugit innersuunneqarput.

**1. Naalakkersuisut Tasiilami nunaqarfiinilu ukuiunerani
qulimiguulimmik inuussutissanik pilersuiner
assartuussisarnerminni pilersaarutaat qanoq isikkoqarpa?**

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmiit KNI A/S akissuteqartinneqarpoq. KNI A/S imatut paasisutissiivoq:

”KNI A/S Kalaallit Nunaanni najugaqarfinnut arlalissuarnut nioqqutissanik pilersuineq pillugu Naalakkersuisunut kiffartuussinissamut isumaqatigiissuteqarpoq, taakkunungalu Tasiilaq nunaqarfiilu ilaapput.

Kiffartuussinissamut isumaqatigiisummi tassani KNI A/S tunngaviusumik nioqqutissanik, najugaqarfiup angissusia apeqqutaatillugu 146-340-nik nioqqutissanut normulinnik tuniniagaqarnissamut pisussaatinneqarpoq. Pisussaaffik taanna, tassungalu nioqqutissat, nioqqutissanut tunngaviusunut ilaasut akiisa aalajangersarneqartarnerat umiarsuakkut nassiussisarnermik tunngaveqarput. Nioqqutissanut tunngaviusunut inuussutissat sivikitsumik atasinnaasut ilaatinneqarput. Inuussutissat taakku atasinnaassusiisa ulluat qaangiukkaangat, KNI nioqqutissanik taamaattunik tuniniagaqarnissamut pisussaaffeqanngilaq.

Kisiannili timmisartuni qulimiguulinnilu inissaqartitsineq apeqqutaalluni Tasiilaq nunaqarfiilu ukiumi piffissani, umiarsuarsuit tikissinnaanngiffiini inuussutissanik sivikitsumik atasinnaasunik pilersorneqarnissaat KNI A/S-imit qulakkeerneqartarpoq. Ullumikkut pilersuineq Islandimiit ingerlanneqartarpoq, aammalu assartuussinermut akiusut umiarsuit atorlugit assartuussisarnermit akisunerungaatsiarput. Akit qaffaataat taakku kiffartuussinermut

Allakkap ullua: 28-01-2025
Suliap normua: 2024 - 24397
Allagaatip ilisarnaataa:
24939941

Postboks 1614
3900 Nuuk
Oqa.: (+299) 34 50 00
Fax: (+299) 34 54 10
E-mail: pan@nanaoq.gl
www.naalakkersuisut.gl

isumaqatigiisummit matussuserneqarneq ajormat, naggataagut tuniniaanermut akinut sunniuteqartarput.”

2. Kitaaniit, uani assersuutitut Nuummiit Kangianut pilersuineq eqqarsaatigalugu, inuussutissanik pilersuineramik assartuussisarnissamik pilersaarutit innuttaasunut akitigut qanoq sunniuteqassava?

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmiit KNI A/S akissuteqartinneqarpoq. KNI A/S imatut paasissutissiivoq:

”KNI A/S-ip naliliinera malillugu Tasiilap nunaqarfiisalu ukiukkut inuussutissanik, matuma siuliani taaneqartunik pilersorneqarnerani ingerlasussanik aaqqissuussinermi piareersaanermilu tamatuma Islandimiit ingerlanneqarnissaa pitsaanerpaavoq. Nioqqutissat Nuummut assartorneqaaqaassappata (umiarsuarmik timmisartumilluunniit) saniatigut assartuussinermut ingerlasussanillu aaqqissuussinermut piareersaanermullu aningaasartuutit ilaneqartussaapput, kiisalu piffissaq assartuussiffiusoq sivilunerussappat, tamanna nioqqutissanik ullulikkalik kinguaatoortitsisinnaavoq. Tamanna naggataagut tunisinermut akiusup suli qaffasinnerulerneranik kinguneqartussaavoq.”

3. Naalakkersuisut, Tasiilamut nunaqarfiinilu inuussutissanik arsartuussisarneq eqqarsaatigalugu, qanoq allanik pilersaaruteqarpat?

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfimmiit Aningaasaqarnermut Akileraartarnermullu Naalakkersuisoqarfik akissuteqartinneqarpoq. Aningaasaqarnermut Akileraartarnermullu Naalakkersuisoqarfik imatut paasissutissiivoq:

”Royal Arctic Line-p 2025-mut angalanissanut pilersaarutaanut pingaarnermut Tasiilap umiarsuaqartarnera 2024-mi angalanissanut pilersaarummut sanilliullugu ataatsimik ilaneqarpoq. Tikittussap kingulliup 6.novembari 2025-mi pinissaa naatsorsuutigineqarpoq. Taassuma tikinnissaa sikunera peqqutigalugu umiarsuup tikinnissaata pinngitsoorsinnaanera sillimaffigalugu pilersaarutigineqarpoq.

2025-p kingorna Tasiilamut umiarsuup inuussutissanik pajulluni tikittarnissaanut pilersaarusiornermut Royal Arctic Line-p novembarimi tikissinnaanissaa apeqquataatinneqassaaq.

Naalakkersuisunit paasineqarpoq, umiarsuit pilersuisut Kangianut tikittartut ilaneqarsinnaaneri killeqartoq. Taamaattumik Tasiilamut nunaqarfiinullu inuussutissanik pilersuinerup annertusineqarnissaa periarfissaqassappat, umiarsualivinnut allanut tikittartunik taamaatitsisoqartariaqassaaq, imaluunniit umiarsuit pisinnaasaannik annertusititsisoqartariaqassalluni.

Tamanna pissutigalugu pilersuisut tikittartut ilaneqarnissaannik aalajangiisoqannginnerani, Naalakkersuisuniit 2025-mi Tasiilap pilersorneqarnerata inernissaa utaqqineqaqqaassaaq.”

4. Naatitanik pilersorneqarneq eqqarsaatigalugit, Islandimiit pilersorneqarnissaq sulii Naalakkersuisunit pilersaarutigineqarpa?

Naalakkersuisut aamma KNI A/S-ip akornanni akulerutinnginnissaq atuutsinneqarpoq, aammalu matumani KNI A/S-ip suleqataasullu allat akornanni ingerlatseqatigiiffiit akornanni niueqatigiinnissamut isumaqatigiissuteqartoqartarpoq. Akulerutinnginnissaq tamanna tunngavigalugu, Naalakkersuisut aamma KNI A/S-ip akornanni akisussaaffiit ersarissut immikkoortinniarlugit, taamaalillutillu ersarissarniarlugit Pilersuisup niueqatigiinnissamut isumaqatigiissuteqarfissai suussanersut pillugit Naalakkersuisut aalajangiisinnaanngillat.

Royal Arctic Line-p 2025-mi angalanissanut pilersaarutaani allassimavoq, taamaallaat umiarsuit ikittuinnaat Islandimiit Tasiilamut toqqaannarlutik angalanartut. 2025-mi Reykjavik-imiit Tasiilamut aallartussat 12-it pilersaarutigineqarput. Juunip aallartinnerani aallartussamut aatsaat sikut ajornartitsinngippata pisinnaavoq. Aallartussat taakku 3. juunip aamma 31. oktoobarip akornanni sapaatit akunneri allortarlugit pisartussaapput.

Matuma siuliani allassimasut, aammalu Naalakkersuisut naatitanik nutaanik Tasiilamut assartuussisarnissanik eqqortunik ilisimasaqannginnerat eqqarsaatigalugit, aallarfissani 12-iusuni taakkunani Islandimiit naatitanik nutaanik assartuussisoqarnissaa ilimanaateqarsinnaavoq.

Neriuppunga matuma siuliani apeqqutitit akineqartut.

Inussiarnersumik inuulluaqqusillunga


Kalistat Lund



Ulloq 18. december – 2024

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

1. Naalakkersuisut Tasiilami nunaqarfiinilu ukiuunerani qulimiguulimmik inuussutissanik pilersuinnermut assartuussisarnerminni pilersaarutaat qanoq isikkoqarpa?
2. Kitaaniit, uani assersuutitut Nuummiit Kangianut pilersuineq eqqarsaatigalugu, inuussutissanik pilersuinnermik assartuussisarnissamik pilersaarutit innuttaasunut akitigut qanoq sunniuteqassava?
3. Naalakkersuisut, Tasiilamut nunaqarfiinilu inuussutissanik arsaatuussisarneq eqqarsaatigalugu, qanoq allanik pilersaaruteqarpat?
4. Naatitanik pilersorneqarneq eqqarsaatigalugit, Islandimiit pilersorneqarnissaq sulit Naalakkersuisunit pilersaarutigineqarpa?

(Inatsisartunik ilaasortaq , Mala Høy Kúko, Siumut)

Tunngavilersuut:

Upernaaq § 37 naapertorlugu apeqquteqaammut 2024-76-imut akissummi takugaanni pilersaarutit inuussutissanik assartuinnermut tunngatillugu pitsanngorsaasoqassasoq akissuteqarfigineqarpunga.

Ukiaanerani umiarsuaq pajuttoq ukiumut naggataareermat taamaalilluni Tasiilaq nunaqarfiilu naatitanik Islandimiit pilersuorneqaqqilertussaallutik - ukiunimi arlaqalersuni Island-imiit pilersuineq ingerlanneqartarmat - innuttaasunullu akitigut sunniuteqangaatsiartussaammat taamaattumik paaserusunnarpoq ukiuunerani, tunu eqqarsaatigalugu, Naalakkersuisut inuussutissanik assartuinnermut pilersaarutaat sumut killiffeqarnersoq.

Apeqqutigineqartut ullut suliffiusut qulit iluanni akeqquneqarput.